

Yimchalu nung tzüngsang-mopung indang awareness sentong agi



Dimapur, Mongputeni/Oct. 24 (TYO): India Meteorological Department (IMD), Ministry of Earth Sciences den lungjemer "Azadi Ka Amrit Mahotsav" nungtem nung District Agromet Unit (DAMU), Krishi Vigyan Kendra (KVK), Mokokchung ajanga "Agromet Advisory Services in the wake of Climate Change" nung aluyimer nem awareness sentong ka Yimchalu yimdak October 23, 2021 nü ayongzüka agia liasü.

Iba sentong nung Dr. Keviletsü Khate, Senior Scientist & Head, KVK Mokokchung ajanga IMD indang Gramin Krishi Mausam Sewa kübok KVK Mokokchung nung 2019 küm DAMU amenokba indang rateta ashi aser iba ya ajanga Mokokchung district nung aluyimer nem Agromet Services agütsür, ta shia liasü.

Pai Agrometeorology ya kanga tongtipang lir, ta sentong nung adener nem angatetdaksü, kechiaser aluyimba ya tzüngsang-mopung aser tzü-

mopung melenshiba yimya nung metaloka lir, anungji aluyimba tsütsü itemji metetjema inyaksü nungdaker.

Anungji pai aluyimer dang tsünüsempongtsü tali züsentettsü mechi Agromet Services nungi tzüngsang-mopung meteta inyaksü ajungshia liasü.

Dr. Ruopfuselhou Kehie, Assistant Chief Technical Officer (Plant Protection) ajanga mesen aser tashidak balala poktetba nung tzü-mopung melenshiba shilem indang rateta shia liasü.

Tzüngsang-mopung melena aoba ama mesen aser shiruru tila poktettsü temelaba akumer, aser aonsotsü nung tashidak temelaba prokshia odaktsür, ta pai ashi.

Pai aluyimer dang saksalema alitsü aser shiruru aser tashidak agi tsüsusempongtsü asüba metetra osang agütsütsü ayongzüka liasü.

Iba sentong nung Ningshiyangerla Walling, SMS (Agrometeorology) ajanga Agromet Services of DAMU

indang onük nung jembia liasü.

Iba mapang lai SMS alert mesüra WhatsApp groups ajanga Biweekly District & Block Level Agromet Advisory Bulletin, Kisan Mobile Advisory Services (KMAS) osang lemsatepba, AIR Mokokchung ajanga pei oshi nung tzüngsang-mopung aser Agromet Advisory tem metetdaksüba, aluyimtsü yimyatem lemsatepba indang ashi aser Agromet Advisory atema MEGHDOOT mobile application amshiyim sayua liasü.

Yimchalu Village Council Chiarman, Kekawati-i sentong nung jembiba mapang yimdaklir aluyimba maparen nung Agromet Services amshia lungjemer inyaksü yongya ataba indang lemsatepa liasü.

Tzüngsang-mopung nung ajemdaker alu ketdangsuba nung aluyimer yaritsü atema MEGHDOOT mobile app indang folder ka saya liasü. KMAS database nung aluyimer 29 tenüng agüja liasü.

Mangmetong Village Council ajanga khukhua aitsür

Dimapur, Mongputeni/Oct. 24 (TYO): Chumukedima Police Station kübok October 13, 2021 nü mapa tamajung inyaker Kevechulo Koza aser Keneiletuo Zumvu nati ozü senso tajung Aremchang Imchen dak taochi mesayur züka merenshiba aser tepsettsü merangba atema kanga

mepelar aser khukhua aitsür, ta Mangmetong Village Council sangdong ka ajanga ashi.

Tangatetba aliba lokti ka nung iba ama temenen mapa tamajung inyaker atema jenjang maka, kong Naga nungertemi region nung yimjung atema meranga inyakteper, ta ashi.

Ozüng nung aliba ama tim ketdangsuba aibelener nem tapet temerenshi magütsütetra Council-i ajem-ajema malitsü aser odangbo metoktsütsü. Shidak angatetba nüburtemi iba ama mapa tamajung inyakba ya aitsütsüla, ta MVC sangdong ajangasa ashi.

JSSN ajanga NEP 2020 indang workshop ayongzük



Dimapur, Mongputeni/Oct. 24 (TYO): National Education Policy 2020 indang workshop ka Dimapur nung agiba mapang, linük tiyong südaktsür New National Education Policy 2020 mapa kima inyaka aoba nung tesayurtem shilem tulu lir, ta Janjati Shiksha Samiti (Vidya Bharati), Nagaland indang organising secretary Pankaj Sinha-i ashi.

JSSN ajanga ayongzükba sentong ya State Secretary Mangyangtula Jamir aser full-timer Dicoy Rongmei nati agia liasü.

Iba sentong nung Pankaj Sinha-i linük nüjiso mangudang

amshiba education policy indang tongmelang agi lemsatepa liasü.

1835 küm Governor General William Bentinck ajanga Lord Macaulay-i yangluba Westernised English education policy agizük aser Bharat indang education policy ajanga magizük, ta pai ashi.

India nüjiso ngur küm 21 sülen 1968 küm linük ka kuma lungjemdaksütsü mechi mezüngbuba National Education Policy yanglua liasü.

Tanabuba National Education Policy ya 1986 küm yanglu aser 1992 küm tanaben yanglushia liasü. Right to Education ya 2009 küm aru.

India dak tiyong südaktsür yangluba New National Education Policy 2020 ya nüjiso ngur education policy tasembuba alitsü.

Iba sentong nung Melien Phom ajanga Foundational Literacy and Numeric Education, Vidya Bharati National Asst. Organizing Secretary Govind Mahant ajanga Early Child Care Education, Principal Aremchang Longkumer ajanga Curriculum Pedagogy aser state president Walenniba Jamir-i Teachers Society indang onük nung jembia liasü.

Iba sentong nung tesayur 32 dena liasü.

Naga Students' Union Dibrugarh pur Hon jubilee amungtsü

Dimapur, Mongputeni/Oct. 24 (TYO): Naga Students' Union, Dibrugarh (NSUD) pur Hon Jubilee October 30, 2021 nikongdang 2:00 ako nungi tenzüka Sacred Heart Cathedral Compound, Dibrugarh, Assam nung amungtsü, ta sangdong ka ajanga ashi.

Iba jubilee mung ya 'Honouring the Past, Envisaging a New Tomorrow' omen nung ajemdaker amungtsü, kong Minister, Planning and Coordination; Land Revenue and Parliamentary Affairs, Government of Nagaland, Neiba Kronu ya tesemdanger tongti alitsü.

Naga Students' Union Dibrugarh ya züngsem 22-i Naga nunger kaketshirtem tsüngta telungjem, tesendaktep alitsü nükjidong nung October 31, 1971 nung tenzüka liasü.

Dibrugarh nung Professor SC Gohain'er kidang mezüng senden amenba mapang Neikhotso Linyü ya mezüngbuba tir shimet aser tatong tir Sadang Ao, tongti zülur Paul H. Pimomo, repsem zülur Maongla Ao aser Alhing Doulgel kimen shima liasü.

Iba sülen Union indang Constitution ya November 7, 1971 nung yanglu aser November 21, 1971 nü mezüngbuba lokti senden amending agizüka amshi tenzüka, ta sangdong ajanga ashi.

Naga nunger aser talisa NSUD atema Dibrugarh nungi tashi temeteter, Medical doctor aser Pharmacist tem jenti Northeast aser Assam nung Medical college tejentiba - Assam Medical College and Hospital (AMCH) aser The Dibrugarh University (DU) nungi adokogo.

Iba Hon Jubilee benjongmung sentong nung Naga Students' Federation (NSF) tir, Kegwayhun Tep-i salem o jembitsü aser züngsem tejenpuria o tatsütsü jembitsü.

NSUD Hon Jubilee mung ayonger züngsem tejenpur aser temolunger ajak iba sentong nung adentsü pelashishia jaoker, ta sangdong ajanga ashi.

Iba benjongmung nung adentsü tejangraba alirtemi Kape Khalo- 7085982466 aser Ronjano- 7630883328; 8256975481 den tongtepreteptsü metetdaksü.

Chang Union Kohima lokti senden amen



Chang Union Kohima indang 48 buba lokti senden October 23, 2021 nü alidang MLA H. Chuba-i o jembidang tangokba noksa ka yangi angur.

Kohima, Mongputeni/Oct. 24 (TYO): Chang Union Kohima indang 48 buba lokti senden October 23, 2021 nü Hotel De Oriental Grand, Kohima nung mena liasü. Iba sentong nung MLA H. Chuba tongti o jembir liasü.

Iba sentong nung tongti o jembiri kin tsüngta telungjem alitsü nungdaker, ta ashi. Pai senden nung adener tem dang ochi tangatetba nung alitsü ayongzükba liasü.

Union indang nükjidongji telungjem asütsüla aser lokti nung ochi lidaktsütsüla, ta Chuba-i ashi.

Iba senden nung Union

ketdangpur tasen shima liasü, kong Ongli Ngaku ya tir, S. Hongkin Mongko ya tongti zülur alitsü aser parnok indang kümsük ya 2021-24 atema alitsü.

Iba sentong nung CUK tir N. Meren ajanga tarur pela agizükba o jembir aser Chang officer temi nübur ajungtsü aser terenlok atema yaritepba asoshi pelaba lemsatepa liasü.

Sentong nung Onou Nguhlung ajanga temeja ken ka aten, S. Anungla pastor, CBLK ajanga sentong tenzüka sarasadem aser Aliba, church secretary, CBLK ajanga sentong tembanga sarasadema liasü.

Khrierei Krotho indang tetsü-tebou ken Vol. 2 sayaogo

Kohima, Mongputeni/Oct. 24 (TYO): Honibarnü MLA Khriehu Liezietsu ajanga Khrierei Krotho indang CD folk songs (Volume 2) sayaja liasü. Iba kensep sayaba sentong ya Dolphin Club office, Kohima Village nung agia liasü.

Iba CD sayatsüba mapang Khrierei Krotho ajanga tebor tajung Angami nunger tetsü-tebou ken wazüka ayutsü mapa inyakba aser kasa mapang lanurtem nem video CD ajanga item ken angazükdaksütsü

maongka agütsüba atema Khriehu Liezietsu-i tenüngsang agüja liasü.

Paisa parnok dang kensep tali adoktsü ajungshia liasü.

Khriegulie Dzuvichu nung mendenpuba, Tsieramia Mechü Krotho-ia iba sentong nung jembia liasü.

Iba sentong nung Keneise-i menden liasü, Viriekhoto Vincent ajanga Khrierei Krotho indang jembir aser Ketsü-ü Dzuvichü-i melepzüng o jembia liasü.

Reporter Jahnobi Boruah nem Corona Warrior Award agütsü



Reporter Jahnobi Boruah nem Corona Warrior Award agütsü dang tangokba noksa nung angur

Guwahati, October 24, 2021 (Agencies): Deobarnü Non-governmental organization (NGO) Sahakhi-i Northeast Now reporter Jahnobi Boruah nem Corona Warrior Award agütsüogo.

Taoba kümtem ama NGO Sahakhi-i taküm-a wadang balala nung nisung aika nem Sahakhi aser Corona Warrior Award agütsüogo.

Asam Sahitya Sabha vice-president Mrinalini Devi-i Jahnobi Boruah nem sempet agütsü.

Jahnobi Boruah nem cheleng chador, trophy,

memento, emblem of rhino aser Bodo nung Aronai agütsü.

Maneni, journalist Nipa Kakati, journalist Ranjita Rabha, journalist Animesh Nath, journalist Mintu Hazarika, journalist Bitopan Bora, journalist Mitali Konwar, journalist Krishna Bhuyan, journalist Chandan Kalita, journalist Pooja Das, advocate Adipta Chaudhury, teacher Badan Gogoi, education officer Arupjyoti Mahanta, nature lover Anup Mohan, RTI activist Kriti Kamal Bora, Law Students' Union president

Sanjib Bora aser TAIPA spokesperson Gunakanta Gogoi nung nem-a Corona Warrior Award agütsüogo.

Sahakhi president Trishna Nath-isa Northeast Now video journalist Dipjyoti Rajbongshi nem tetushi balaka agütsü.


Dipjyoti Rajbongshi ya 2022 küm atema Sahakhi Award nung shimoka lir.

Iba sentong nung tongti tesemdangerji Asam Sahitya Sabha vice-president Mrinalini Devi liasü aser actress Chetana Das o police officer Mukul Saikia na tetushi süa jaokertem ama shilem agi.

Piles Anepaluba - H. Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüaka, tang **H. Umar Chesam contact no. 9863758600 / 8416087414 National awardee H. Umar Chesam**

Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**

Yours sincerely - Wethule Chakesang Add: 5th Mile



Mizoram nung Myanmar nunger 12,939 shi jenoka lir

Aizawl, October 24, 2021 (Agencies): Tetsür aser tanur densema Myanmar nunger 12,939 shi Mizoram kübok tesem balala nung jenoka lir ta police ketdangsür kati ashi.

Myanmar mitkar aser lisopur telungpur züngsemtem tsungda maneni raraba ajanga Myanmar indang Chin state nungi refugee timbaka Mizoram kübok anüdoklen aser anüolen tip arrtsü adena aruba manener, ta Honibarnü police ketdangsüri ashi.

Tang tetsür aser tanur densema Myanmar nunger nisung 12,939 shi Mizoram kübok tesem balala nung jenoka lir, ta paisa ashi.

Myanmar nung rongnung nisung 1,518 shi indang tejangja osang magii lir.

Anogoshia kidanger linük nungi refugee tasentem maneni arur asünung, refugee tem timba akümer. Kasa mapang refugee kar shirnok arrtsü (international border) anasa alir parnok mapang shia oli aruli ta senzür, ta ketdangsürisa metetdaksü.

Myanmar nungi arurtem nem lisopur, lokti lennirtem, NGOs, Arogo balala aser kija balala ajanga chiyongtsü aser anisüngzükdak agütsüdar.

Mizoram arrtsülen aliba district trok - Champhai, Lawngtlai, Siaha, Serchhip, Hnahthial aser Saitual nung refugee 9,411 shi anenzüka lir.

Myanmar nungi arurtem ya Mizoram kübok district ajunga (11) nung anenzüka lir, kong Champhai district nung refugee 5,998 shi anenzüka lir. Ano Aizawl nunga Myanmar nung refugee 1,622 shi anenzüka lir.

Tuipuiral group of Young Mizo Association (YMA) president MC Lalramenga-i ashiba agi Indo-Myanmar arrtsü anasa Champhai district kübok Tuipuiral tesem kong yimtsüng 21 shi lir iba tesem nung Myanmar nung 2,690 shi jenoka lir.

Myanmar indang Chin state nungi refugee tem maneni Mizoram arrtsü yimtsüng telungi aiter aser alu aruba (harvest) sülen ano Myanmar nungi refugee timba arutsü imlar.

Lisopurtemi Tuipuiral tesem kübok yimtsüng 14 nung relief camp aser ki (temporary shelter) yangluja lir.

NGOs balalai maneni teyari agütsüba dak alaka Arogo talisa Presbyterian, Baptist aser Roman Catholic temi item refugee nem senotsü teyari agütsüba dak alia chiyongtsü aser süshitem agüja yaridar.

Central Young Mizo Association (CYMA) vice president Lalhmachhuana-i ashiba agi, Myanmar nung (refugee) yaritsü atema iba tentet ajanga sen lakh 15 agütsüogo.

Nüburtemi tenla agütsüba nungi lakh 15 ya bendentetta liasü, ta Lalhmachhuana-i ashi

Taruba hopta, Mizoram anüolen tip arrtsü jenoka alir Myanmar refugee tem atema iba tentet yagi süoshi/sübosülemtsü truck ana shi yoktsü sentong lir, ta paisa ashi.

Mizoram aser Myanmar na tsungda kilometer 510 shi international boundary lir.

Border district trok rongnung, Champhai, Siaha, Lawngtlai aser Hnahthial nung September 7 nungi Myanmar nungi refugee timba aruba asadangtetogo, ta ketdangsürtemi ashi.

February ita military junta ajanga Myanmar sorkar atsüngdoker külen nungi Myanmar nungi nübur aika Mizoram nung jenokdar.

Myanmar nungi Mizoram-i arurtem ya Chin lokti nungi timba lir, shirnok Mizo kin den tesendaktep (ethnic ties) lir.

Iba dak sendakba nung, Mizoram sorkari 'humanitarian ground' nung Myanmar nung refugee tem jenoka lidaktsütsü asoshi aiben mepishidangogo, saka iba maparen nung Centre-i telangzüba kecha magütsü.

Assam nung fire crackers nokdangtsü



Guwahati, October 24, 2021 (Agencies): Taküm Diwali benjungmung mapang Assam State nung fire cracker tem pokshishiba aser ayokba nokdangtsü.

Assam indang Pollution Control Board (PCB)-i tan Diwali benjungmung mapang state nung firecracker tapu balala pokshishiba aser ayokba

nokdangtsü asoshi sangoktsüogo.

National Green Tribunal (NGT) ajanga agütsüba tetuyuba nung anidaka iba benjungmung mapang mopung menenba (air pollution) ajemdaktsütsü atema osang tejangja ka magütsü tashi iba tetuyuba nung anidaktsü.

"Iba maparen dak sendakba

nung State pollution control board-i State indang DCs aser SPs ajak dang tezüluba ajanga osang agütsüogo" ta PCB chairman Arup Kumar Misra-i ashi.

Fire cracker supply asüba nokdangtsü/anentsütsü atema PCB-isa police dang tapet mera agütsü asoshi metetdaksüogo.

"Shirnoki ozüng alema firecracker tem alidena ayur, parnok ji aputsüla. Firecracker benshirtem aputsü asoshi police aser administration khuret asütsü, kechiyong PCB-i tetuyuba dang agütsür," ta Mishra-i ashi.

"Iba maparen dak sendakba nung anogoshia PCB nem osang agütsütsüla," ta Misra-i shisem.



October 23, 2021 nü Serchhip Battalion-i Mizoram kübok Champhai district nung mita aodang prangpong-injang aika ngutetogo. Sepaitemi Tiau Kai village council züngsemtem anir mita aodang arem nung prangpong injangtem miima aliba angu. Iba tesem nung live rounds 100, Neogel Gelatin sticks 38 aser Detonators 251 ngutet.

Akhil Gogoi-i by-election nung timtem magütsütettsü: Atul Bora

Guwahati, October 24, 2021 (Agencies): Assam nung by-election agidang MLA Akhil Gogoi nungi tetsükdaktsü kecha malitsü ta Asom Gana Parishad (AGP) president Atul Bora-i ashi.

"Chief Minister Himanta Biswa Sarma lenisüba kübok taoba ita 5 tashi Assam kanga renlokogo. State nung alirtemi state renlokba nung tenüng sünga alitsü. Anungji nüboritemi ruling party aser yariteperitem nem vote enoktsütsü" ta Bora-i ashi.

"Taoba election nung Akhil

Gogoi-i kechi inyak. Nisungtemi ibaji mamadok lir" ta paisa ashi.

"Pai jembiba nung tangatetba kecha mali. Nüboritemi tamagütsü angateta lir. BJP-i aniba Mitrajut ajanga menden 5 prong nung takok angutsü" ta Bora-isa metetdaksü.

October 30, 2021 nü Assam Legislative Assembly, 2021 menden 5 nung by-election agütsü.

LAC punguji -28 Gossaigaon, 41 Bhabanipur, 58 Tamulpur, 101 Mariani and 107 Thowra Legislative Assembly Constituency tem lir.



TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI(OCTOBER) 25, 2021

Nagaland nung taruba election

Atangji, tang tensa apibo Nagaland nung kodang aser kechikoma election ka alitsüar meshitet, kechiyong tang Delhi nung India government den Naga nung linük tenzükertemi Naga yimten tebilemsü ken o tatembang küma latettsü merangba ya takok angu nungbo, Nagaland nung yimten tensa balaka akümtsü. Aji oda, mapang tatsüka atema interim government-ang ka akümtsüa akok aser ashiko ano tang aliba assembly constituency-tem artsüang melenshia akümtsüa akok. Ano, shibai metet, Naga yimten ken o telatetba ka dangi marutetyonga, Nagaland nung tang amai government tenzükertem nem ita sen dena magütsütet kümra, yimten nung meimlaba mapangang tenjitsüa akok. Item ajak ya tebilemba dang, anungji ataloktsüa akok mesüra mataloktsüa akok. Ajisüaka, yimten inyakyimbo kasa dang aotsü asünungji, kenübosa ano akhi ama nübortemi pei mulungba tatar yimsüsür shimtsüsa election agiba mapang arutsü. Iba tangatetba nung, election-ji kodang agidir agiang, senso shia tekolok shisatsü renema atatsübaji kanga nüngdaker. Aji oda, taoba election agiba mapang den apitep nungbo Nagaland nung taruba election 2023 küm tetenzüklen election agitsü, anungji joko mapang azüngtsübo ita 16 shi dang anünga lir. Ashiko, shin o nung ashi ama, yimten nungbo shinga teti atema tembar asütsüsa mali aser yamaji tsükchir asütsüsa mali, anungji taruba ita 16 tsüngdaji Nagaland nung yimten yimsüsür aser lenirtem rongnung tatalokba aika ataloktsüa akok. Ashi, tang amai opposition telok mali ser election nunga tangatettep, prepoll alliance, yanglur constituency kecha nunga tetokper mali tatar 60 prongla shinga, shinga dena metoktepi adoktet nungbo koda jungla. Atangji, tatar senden nung züngsem meliaka, tanga yimten telok tejentem rongnung Congress lir aser ano yimten tasen ka tenüng agi, Rising Peoples' Party (RPP) lir, anungji parnoki akok tashi constituency teimbaka nung tokteptsü merangtsü. Ajisüaka, tanü bilemdangba onük nung yabo parnokji khen toktsür, tang amai Nagaland nung opposition telok mali ser election agi nunga koma süla (?) ta asüba nung bilemdangra, ashiko, iba jagi asenok nem Nagaland tarutsü tensa indang tangatetba karbo agütsütsüa akok. Taoba election nung NDPP aser BJP telok na tsüngda metoktepi tangatettep nung menden lemsar tangar teloktem den toktep. Iba amaji taruba election nunga parnok tsüngda tangatettep yangludi süra tangbo tena den NPF teloka dena lir, anungji par asem rongnung menden 60 ji lemsar agitsü merangtsü. Aji oda, NDPP, BJP aser NPF telok asem rongnung tangatettep nung menden 60 ji lemsatetra, ajibo election magidangyongi tang aliba UDA teloki taruba government-jia kümogo ta bilemdi. Ajisüaka, taruba Nagaland election nung aji takoktsü na ? Ibaji khen bilemstübo zübazübar saka mapa küma inyaksü temelabo masütsü. Ashiko, taruba election nungbo NDPP aser NPF telokji yutsür BJP teloki tang menden 60 prongla nung toktepnütsüa akok. Mesüra NPF telok ya, tatar aika liaka, opposition nung ali marem government nung adentsü mulungtetba ya teti asoshi NDPP nung alirtem den telok ka küma loktepnur asütsüa akok. Mesüra, pai yangluba ki asünungji, NDPP nung lenir aser Chief minister, Neiphiu Rio-i an tepong alidak NPF ki-ang menungraa alitsüa akok. Item ajakji kodang bilemdangdir, ashiko, 2023 küm atongdangbo an tepong tenüng ya melener tang NDPP aser NPF nung adener ajak iba an tepong aliba ki tasenba nungjiang lia ajurutsüa akok. Yimten nung kecha meteta mali, tanü tamakoktsü ama ka anguba to asüngbo ajiang temelaba ataloker alir. Iba amaji tang Nagaland government bener aoertem rongnung telok dena melena menden atsüshitep dang, Congress aser RPP teloktemi nübortemi parnok dak temulung lemtettsüsa ken o jembiteta otetra, parnok asoshia mapang tajung ka arur asütsü. Atangji, tang government nung alirtem yabo akhi UDF nungi NNDP aser NPC ajanga NPF aser NDPP nung adenertem aser ano kar Congress nungi arurtem, anungji parnok ajung majung nübortemi meteta lir. Ajisüaka, Nagaland nung yimten telok tasen RPP telok nung alirtem yabo nübortemi mengudang aser mangashidangba telok, anungji parnok asoshi yimten telok tejen pur loktepbba telongjem den tokteptsübaji yimten tongpang tuluka asütsü. Aji oda, taruba election nung koba teloksa toktepdar toktepang, tejen tasen ta mali, shingaia shinga vote malitsü aser shingaia shinga vote mayoktsü ta inyaktetra, Nagaland asoshi anogo tasen tajung ka tenzükba anogoji taruba electtionji asütsü.

OLEMSABANG

Hindu Tamangba Yimsü Kübok Malitsü Ne Meyongnem Nüngdak

Meyu Changkiri

(Yashi adok nungi...)

Asen teinyaktsü

Hindutva tesayuba kobai India ajonga Hindu Yimli kümdakja, tangar shilu aser tangar telok second-citizen kümdaktsütsü meranger, ya jangja janga angatettsüla. Ya tai tangatetba ta sayutsüla. Tia maka sen dak dang rangdaker, mesüra development dak dang repranger Hindutva tangatetba aser tasa ya aiben India nung Khristantemi angatettsü memerang. Ano arok temeten atema noktakba nung Khristantemi ola madoker. Tanü India nung "Farmers Protest," Article 370, Citizenship Amendment Act, National Register of Citizens, National Population Register anema nüburttem rarar saka Khristani ola adokba tejangja mali. Demonetization, GST, unemployment, underemployment, pandemic, "sliding rupee," "crony capitalism," aser yamala mesükba onüktem aika ajanga nüburttem kanga timatemer, saka Khristani shilem agiba aikabo mali. Iba denji India nung Religious Nationalist ajanga Media House arakmoker tiyazü proker sakaKhristan telok ola kanga ajema lir. David Landrum ashiba agi, tamangba yimsü nung nüchiso jagi tanga meimchir temeten aika soita ayur. Alima nung Indiaji democracy tulutiba süaka, tamangba yimsü telok tilatem kümzüka meyutetra, mesüra parnok anema tim masüba mapatem inyakra, ibaji chichiba democracy masü. Anungji democratic principle nung jajaba yimden yimsüsüba yangertsü asoshi tamangeri odia shilem agitsüla.

Ano Covid wara aser pandemic tia ajanga lokti nung tebandang aser tepila aika adokdaktsüogo. Takar aser sensaker tetsüngda (Rich versus poor), jila nung alir aser yimtsüng nung alir tetsüngda (urban versus rural), high caste versus Dalit & Tribals. India nung Religious Nationalism sashia ainba shia item tebilemstütem teimba züiner. Iba den külemi India nung urbanization sashia züinba ajanga lokti nung nüburttem atema timtem aika bener arutsüdaki. Linük nung Religious Nationalism ali tashi item timtem teimba akümtsü. Kechiyong parnoki machinery aliba ajak amshia Religious Nationalismi mulungba ama bilemstü, jembitsü aser inyaksü nüburttem tekolok shisatsü nung enoktsür. Tamangba yimsüji amshiba yimden tashi arakmoka ayutsü meranger. Tamangba yimsü aser Yimden tepila yutetba yimden ka asoshi asenoki noktaksüla.

Iba ama mapang ka nung, media house aser social media dak tashi tulu lir. Media house kiburtem aser social media amshirtem ya angeteta tajemrep tia nung alirtem atema tajung aika inyaktettsü. India nung tamangba yimsü telok tilatem (religious minority) timtem angateta nüburttem nem metetdaktsütsüla. Social media amshirtemi inyaktettsüba mapa kar:

1. Tiyazü osang soita ayutsü aser meproksü meji media nung shilem agirtemi oshi balala jangja meteta alitsüla (Hindi, English, regional languages).
2. Yimsü balala tesendaktep aser tangatettep nung junga alitsü inyaksüla (in line with Article 20 of the ICCPR).
3. Social Media tajungleni amshitsü asoshi yimsü lenirtem ajungshitsüla.

Anungji, akokba lemanng ajak nungi arogo aser Khristantem dang item tebilemstütem angateta ashitsüla. Tila tanurtem aser lanurtem dang Indian Constitution, Hindutva, aser yamala onüktem rateta sayutsüla. Item onüktem ya jangjaa lira, Religious Nationalism tashitak nungi jenbua litettsü. Iba jagi nüburt jenti yaritettsü, aser lokti tejakleni aotsü. Arogoi akok tashi lokti tentet balala den (civil societies) yaritepbba alitsü merangtsüla. Kechiyong iba Hindutva Ideology ya tanga kecha agia masü sakanem tangatetba shisatsü agütsü nung dang koktettsü.

Otembang

India ya Hindu nungeri dang akümba lima ka masü. India ya shilu, oshi, tamang yimsü, sobaliba aikati akümba lima ka. Item ajak ya Tsüngremi moatsü, aser iba ya ajanga India lima takar ta sayur. Anungji item ya ajaki akhümtsüba, wazüka ayutsü noktakba political party aser yimsüsür nüngdak. Ano alinük ka tejakleni odaktsütsü nüburt teimbai mulungba yimden latettsü tim. Tanü sen agi, senso candidate, tashiyim amshia, tiyazü o proka yimsüsüba menden nung amener aika lir. Itemji tanaben shimra ano alima tali raksatsü. Lenir shibai nüburt teküboka jenjang nung alir ajungkettsü merangba nükla lir itemji shilemstüla. Asen meyongnem tashi ajanga temelenshi adokdaktsütsü ajaki merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Lotha nunger Reverend tanubosangji pastor Limhatung kümogo



October 24, 2021 nü Lotha Baptist Church Diphupar nung Pastor, Limhatung Lotha ordain asüba mapang tangokba noksa nung angur. Lotha Baptist Churches Association (LBCA) kübok ordain asüba Reverend tanubosangji pa asütsü.

Dimapur, Mongputeni/October 24 (TYO): Lotha Baptist Church Diphupar (LBCD) nung Pastor, Limhatung Lotha (arrshi küm 48), October 24, 2021 nü Lotha Baptist Churches Association (LBCA) kübok Reverend ordination sentong agiogo. Lotha Baptist Church Association Executive Secretary, Rev Dr.L. Tsanso den LBCA nungi Reverend tem aser ketdangpurtemi ketdangsüa iba sentong agiogo. Lotha Baptist Churches Association kübok Lotha

nunger rongnung ordain asüba Reverend 88buba aser tanubosangji Limhatung Lotha kümogo. Limhatung Lotha aser pa kinüngtsü den tanurtem den tezüngzüktep agiba sentong Rev. Kaifa Ezung aser Rev. J. Thungjamo Lotha nati ketdangsüa agi aser Executive Secretary, LBCA, Rev.Dr. L.Tsanso-i ketdangsüa ordination sentong agia liasü. Iba sentong nung ETC nung taoba mapang Principal, Rev. Dr. Ezamo Murry-i Tsüngrem O jembu.

LBCA nungi Reverend temi pastor Limhatung atema temoatsü meshija sarasademtsü aser ordian asüba temaitsü pa nem putir sü abenlokja liasü. Kasa sentong nungsa LBCD Choir-i ken ka aten aser Rev. Nchumbemo Shitiri-i Lai azüng. Iba sentong ya LBCA Ordination Board Chairman, Rev. Khonbemo P. Kikon leniba nung agi aser Ordained Pastor Reverend Limhatung Lotha leniba nung Kibuba benjung agia iba sentong tembanga liasü.

ANO GO ABEN TSÜNGREM DEN

Ne mulungjang mitang

Ne mulungjang kanga nendaka mitang; kechiyong ibanungi taküm tzüpokdak adoker. A. Shin 4:23

Asen mulungjangi asen kolok dang ashir aser tebilemba aser tim shisatsü kuli asüba teyongtsü lir. Ibai asen tejangraba (emotion) aser temulungtetba dena lir aser ibai asen taküm telung ajunga lir. Asen mulungjangi shisatsü ajak rizüngdak lir aser aseni jembiba, anguba aser mapa ajak adokdak. Asen mulungjang mita alitsü Solomoni ashir. Anungji ibai koda inyaksü tekong 24-27 nungi telangzüba agütsür. Shisatsüji anasa yuang. Tsüngrem O nung temulung agüjang aser ibaji temulung nung yuang. Asen mulungjang nung kechi ayutsüla Pauli ashir - ochi, akhümtsübu, temeten, temerük, temeimtsü aser yamala (Fil. 4:8).

Tanü asenoki ibaji koda ataloktsütsü akok ? Asenoki tajungji ayutsüla aser tamajungji endoktsüla. Asenoki kümdangtsü - asenoki kümdanga angazüktsüla. Iba nung noksa, TV aser asenoki shirnok den mapang endoker, ajak dena lir. Asen mulungjang nung kechi ayutsüla Dawidi ashir, "Ni Ne O kü mulung nung rizünga ayu" (T. Ken 119:11). Asenoki anogo shia Tsüngrem O nung mapang entoktsübaji mezüngbuba südaksüra, aser anogo shia sarasadem nung Pa den mapang entokra asenoki asen mulungjang anogo tepiyong sütepa anüker.

Oh ! kü Tsüngrem aser Oba, Nai ni shimtet aser kü den jajaba agi ni kanga moatsügo. Tanü ni koba ochi aser akhüm tsübutsü lir item nung temulung agütsütsü yariang. Amen.

Tanü Karnataka state nung Khristantemi longkak aittsü

Hubballi (Karnataka), October 24 (Agencies): Hombarnü (October 25) Karnataka kübok Hubballi nung aliba St. Peter Arogo Tenla kima Khristantemi longkak aitiba sentong ka agitsü; state nung Khristantem anema inyakba kanga bulua akümba aija Khristantemi longkak aittsü, ta Hubballi-Dharwad Christian Community Tir, Sunil Mahade-i metetdaksü.



October 22, 2021 nü Karnataka kübok Belagavi nung Khristan lenirtemi Deputy Commissioner, M.G. Hiremath nem temepishiba shidi ka agütsüdang tangokba noksa nung angur.

Honibarnü Hubballi nung osangbenertem den jembidang Sunil-i, "State sorkari Arogotem anema survey agitsü aliba anema onoki longkak aittsü. Tamangba yimsü beshitsü atema linük temzüng ajanga onok nem temeden agüja lir, ajisüaka sorkari state nung official aser unofficial Arogotem ajak jangjatsü atema survey ka agitsü tetuyuba agütsüogo; ibaji ajanga Khristantem melung yirur," ta metetdaksü.

"India nung Khristan yimsü arur küm noklang aika jungogo. Tanga yimsü amangertem nem temeden agütsüba ama onok yimsü beshitsü atema linük temzüng ajanga onok nema kasa temeden agüja lir. Onoki kangshia tangartem Khristan yimsü dangi meyipdaksür ta MLA kari onok nem tai tongloktsür, ajisüaka item ajakji tiyazü, kechiyong onoki kangshia tamangba yimü memeyipdaksür," ta paisa metetdaksü.

Tawa Navanagar nung Khristan yimsü dangi meyiper Somaling Avaradi-i sarasadem sentong ka ayongzüka agiba mapang nung Hindu nungertem maaka liasü. "Onoki iba tatalokba aitsür aser aibelenertem anema

inyakang, ta takhangba agütsür," ta Mahade-i ashi. Honibarnüa APMC station nung Khristantsür kati telok kar anema ken o benoka liasü. Taoba Amongnü tetsür ka tenüng agi, Ganga leniba nung prayer home ka nung Khristantem sarasademba mapang nung Hindu telok balala nungi nisung 60-70 shi arua prayer hall raksaja liasü, iba tatalokba sülen lai police station nung ken o benok. Karnataka nung Arogotem anema survey agitsü tuyuba aser anti-conversion ozüng benoktsü aliba anema anogo ishika jakedang All Karnataka United Christian Forum for Human Rights nung züngsemtemi state sorkar nem temepishiba shidi ka agütsüogo. Denomination balala nungi Khristan lenirtemi Deputy Commissioner, M.G. Hiremath ajuruba sülen pa nem temepishiba shidiji agütsü.

Shidi nungji yamai shia lir, "Karnataka nung Backward & Minority Welfare Department-i Khristan missionary tem aser Tenla kitem mita aotsü lemtetba osang onoki angazükogo. Iba ya amajok asütsü aser iba nungjaji tajung kecha madoktsü. Yimsü meyipdaksüba aser yimsü anema tekülem sentong tagidak mapang nung timtem agüja pastor tem, putirtem aser sister tem anema inyakba mapang ka nung iba ama survey agiba ajanga lendong ang adoktsü. North India aser Karnataka nung Khristantem anema inyakba kanga bulua ataloker. Iba ya asalentong yanglur inyakba ama repringteter." "Anti-conversion Bill benoktsü alibaji amajok aser nüngdak maka. Yimsü alia amanger kari anti conversion ozüng benoktsü atema sorkar lenirtem dang mepishir ama repringteter. Onoki state sorkar dang Khristan missionary temi

lapokba shisaliok rejtem aser health centres mita oa item ama reju nung Khristan yimsü dangi meyipdaksür asü masüar asadangtsü mepishir. Ibaji ajanga parnoki, Khristantemi tangartem yimsü meyipdaksür ta tai tongloktsübaji yazü ta jangjatsü, iba denji külemi tanga yimsü amanger nütsüng den medemdangra Khristan nütsüng tajemba akümba jangjatsü," ta tongti putir, Derek Fernandes-i shidi ajanga metetdaksü. "Sorkari item reju mita oa asadangra India nung Khristantemi tenzüka mapa tajung inyakba aser linük yangerba nung yariba mapatem sorkari jangjatsü," ta shidi nung shia lir. "Kangshia tamangba yimsü meyipdaksüba mesüra ashikülak ajanga yimsü meyipdaksüba anema onoki nokdaker. India linük temzüng nung ajemdaker onoki

ozüngtem shidak beshir. Ajisüaka linük temzüng Arlla 25 (iba dak alia 26, 29 & 30) arrlatem ajanga tamangba yimsü mashie amangtsü, beshitsü aser yimsü proktsü atema senso ajak nem temeden agüja lir. Linük temzüng nung ajemdker aibelenertem nem temerenshi agütsütsü, süra asenoki anti conversion ama ozüng ka nüngdaker asü?," ta shidi nung shia lir. "Khristantem ya linük meimertem, ozüng beshirtem aser linük nung sensakertem tenzüka mapa tongtiji Khristantemi inyaker. Ajisüaka item ama ozüngji (anti conversion) kari tim mesüi beshitsü aser tai makertem reshikangshitsüa akok, ta onoki arendaka bilemer. Anungji onoki sorkar nem onok pusemdaktsünser," ta Khristantemisa metetdaksü. Deputy Commissioner, M.G. Hiremath ajurur Khristan lenirtemji Rev. Nandukumar, Rev. K. Vijay Prakash, Clara Fernandes, Fr. Pramod Kumar, Fr. Philip Kutty, Fr. Nelson Pinto, Rev. Nooruddin Mulla, Rev. Martin, Rev. Thomas aser Rev. Cherian Louis Rodrigues nung liasü. Taküm küm tenzüker September ita tashi nung India nung Khristantem anema inyakba tatalokba 305 liasü aser item tatalokba rongnung Karnataka nunga tatalokba 32 liasü. Uttar Pradesh nung Khristantem anema inyakba tatalokba timba liasü, iba sülen Chhattisgarh nung tatalokba 47, Jharkhand nung 30 aser Madhya Pradesh nung tatalokba 26 liasü.

OLONG PAITEP # 5976

1		2				3		4		5
				6						
	7		8							
9					10				11	12
			13			14	15			
16					17			18		
				19		20				
21		22								23
24										
							25			

TIPILEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazung	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. ___ tatsü	- (3)
24. Tenüng kasa jatepba	- (7)	12. Tebür kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5975 TELANGZÜBA

TIPILEN :	LANGTSÜNGLEN :
2. Anükalem, 4. Mesak, 5. Apet,	1. Kündang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.



PASTOR O YIJEMER NA SENSAXEMER

Pastor : Adianu, na yi ya teti ajemer asü khen khen dang ajemer?

Yijemer : Ni yi ya khen khen dang ajemer.

Pastor : Saka nibo teti ajemer ama dang angurato.

Yijemer : Ni yi ya khen khen dang ajemer saka khen khen ji teti tenjia atar, aser ni ibaji menokdangteter.

Pastor : Tetezü?

Yijemer : Tetezü khen khenji teti ajemer atibai!

Lilir : WhatsApp

TANÜBO NAI LANGZÜANG

Q. US-i koba tesem nung Hypersonic Missile tendang?
 A. California B. New Jersey
 C. Florida D. Virginia

===== (Taruba adok nung onoki langzüsü)

YASHI ADOK TELANGZÜBA : UK

AO OSHI ANGAZÜKDAK:

TANÜ ANGAZÜKTSÜBA OJANG



Lempet
 (n) tatsüka masü, temekonga masü (lukewarm)
 * Tzü **lempet** agi chigu tajungba.

Lemsa
 (v) nisung shia pei shilem agi (share)
 * Yisui nütsüngtem nem amtsük **lemsa** agütsü.

Happy Birthday

TENÜNG : SALANGTILA WALLING
 Tasoba anogo : 25th OCTOBER 2020
 Küm : 1
 Talidak : Lengrijan, Dimapur
 Tsüngremi jala Salangtila küm ka tashi Pa taochi aser temoatsü nung anir aru nung Tsüngrem tenüng tali asanger. Ano maneni Tsüngremi jala nem arishi talang den anema aliba taküm moajangma ta sarasademtsur.

-Temeim Oba, Oja, Obou, Otsü aser Kinungertem.



NAI-A YA METETTER MA

OCTOBER 25 NÜ ASOR TONGTIBANG NISUNG KAR:

- Austrian composer Johann Strauss (1825)
- French composer Georges Bizet (1838)
- Automobile entrepreneur John Francis Dodge (1864)
- Painter Pablo Picasso (1881)
- Singer Helen Reddy (1941)
- Olympic gold medal wrestler Dan Gable (1948)
- Actress Soni Razdan (1956)
- Drummer, Musician Chad Smith (1961)
- Actor Antony Starr (1975)
- Singer Katy Perry (1984)
- Singer Ciara (1985)
- Model Sophie Gradon (1985)
- Indian cricketer Umesh Yadav (1987)

SUDOKU # 6017

TELANGZÜBA # 6016

	2		8	7	3	5			1	5	2	9	6	4	3	8	7	
3	5	6			9		7	4	4	9	6	8	7	3	5	1	2	
			5	6	4		3		3	7	8	1	5	2	4	6	9	
		4				1			6	1	3	7	9	5	2	4	8	
7			9	5		2			5	4	7	2	8	6	9	3	1	
2	3				6	9		5	8	2	9	3	4	1	7	5	6	
	1	2				3	5		2	6	5	4	1	7	8	9	3	
9		3				5		4	7	8	4	6	3	9	1	2	5	
8	4					2	7	9	1	9	3	1	5	2	8	6	7	4

OJANG LUTEP # 5562

NGJUA :

IBALA :

PAMANG :

MTEMEIPA :

AJAMI :

HIMEJMESUNG :

NGMAPA :

GANUN :

MTEMEIPA :

ÜLALITSA :

OJANG LUTEP TELANGZÜBA # 5561

TENÜKMEREM AGI SÜNGER ALIBA YIMTI NUNG KODANGA
 TANISHIR TAJUNG MANGÜTSÜ

TAN HOPTA ATEMA - KOMA SÜLA ?

Q. Naga nunger yimten tebilemstü ken o ya India-i, Naga nunger tanga teloktem yutsür, NNPGs telok den dang latet nunga koma süla ?



Kolkata, October 24, 2021: India nung petrol aser diesel totzü jenjang maneni atuba anema Amongnü Kolkata nung West Bengal Bus & Mini Bus Owner Association nung züngsemtemi longkak aita bus ka lisü agi sendaker atsüba noksa nung angur.

PM Modi-i Italy aser UK semdangtsü; G20 senden nung adentsü

New Delhi, Mongputeni/October 24 (Agencies): October 29 nungi November 2 tsüingda Ato kilonser, Narendra Modi-i Italy aser UK na semdangtsü; iba mapang nungji pai G20 senden aser climate change senden na nung shilem agia adentsü.

October 30 aser 31 nü Italy nung G-20 senden nung Narendra Modi-i Afghanistan tensa, climate change tebilemstü onüktem aser coronavirus wara atema alima linüktemi longjemer inyaksü atema jembitsü imlar, ta Amongnü ketdangsertemi metetdaksü.

Ato kilonseri Rome aser Glasgow na nung 16buba G-20 Summit aser World Leaders' Summit COP-26 na nung adentsü, ta Ministry of External Affairs (MEA)-i metetdaksü.

Italy Ato kilonser, Mario Draghi-i jaokba nung ajemdaker Modi-i Rome nung ayongzükba 16buba G-20 Summit nung adentsü.

G-20 telok nung alima nung rongsenkettsüng tulu aliba linüktem lir. Alima nung GDP

shilem 80 bo item linüktem nung lir aser alima nung shishilembaba shilem 75 item linüktem nung lir.

1999 küm nungi G-20 senden amener aser 2008 küm nungibo küm shia iba senden ayongzükba sorkar tongti ketdangsertemi shilem agir.

India nunga 2023 küm mezüng G-20 summit ayongzükba agitsü.

Rome nung ayongzükba G20 senden nung züngsem linüktem nungi tekolakpurtem, European Union nung ketdangsertem, tejaoker linüktem nungi lenirtem aser international organisations balala nungi lenirtem aika adentsü, ta osang angazüker.

Iba senden nungji G-20 lenirtemi coronavirus wara, climate change aser sensak tia agientsü atema tongti süa jembitsü. Iba dak alia Afghanistan tensa atema-a jembitsü.

Modi-i tang agi tibenbuba G-20 senden nung adentsü aser iba senden mapang nung pai linük balala nungi lenirtem den

jurila senden amentsü.

Taküm G-20 senden omenji 'People, Planet, Prosperity' asütsü.

Senden nung wara anema raratsü, rongsenkettsüng asentenshitsü, climate change dak sendakba tayongzükbatem atema inyaksü aser food security densema tongtibang onük aika jembitsü, ta MEA-i sangdong ka ajanga metetdaksü.

G20 senden tembangba sülen Modi Glasgow-i aotsü aser yangji 26buba Conference of Parties (COP-26) senden nung shilem agia adentsü.

British Ato kilonser, Boris Johnson-i jaokba nung ajemdaker Modi-i climate summit nung adentsü. Iba senden ya November 1 aser November 2 anogotem nung amentsü.

Modi-i 2015 küm tesüsabuba COP-21 senden nung dena liasü aser iba mapang nungji Paris Agreement maparen tembang aser taküm nungi inyakyim tenzükba liasü.

Totzü jenjang atuba anema Congress-i Nov. 14 nungi longkak aittsü

New Delhi, October 24 (Agencies): Linük nung petrol aser diesel jenjang maneni atuba anema Congress party-i November 14 nungi tenzükba November 29 tashi longkak sashia aittsü.

Osangbenertem den jembidang Congress general secretary, KC Venugopal-i, "Petrol aser diesel jenjang maneni atuba anema onoki November 14 nungi November 29 tashi longkak sashia aittsü," ta metetdaksü.

"Congress lenirtemia peipei tesem nung longkak aittsü. Anogo 15 nungjagi hopta kabo Congress committee balalai peipei tesem nung longkak aittsü," ta pai metetdaksü.

Chennai nung osangbenertem den jembidang Congress lenir tain aser taoba mapang Union Minister, P. Chidambaram-i Centre sorkar aitsüba den külemi, Reserve Bank of India (RBI)-i ashiba ama totzü saru ajemtsüla, ta ashi.

"Sorkari merumeruba ajanga petrol aser diesel jenjang atur. Ibayongji RBI-i saru ajemtsü atema benoker. Saru ajemtsü atema RBI-i sorkar dang maneni ashir," ta taoba mapang Union finance minister, P Chidambaram-isa metetdaksü.

Tesüiba anogo pezü tashi atonga sorkari petrol aser diesel jenjang tuogo.



Jammu, October 24, 2021: Amongnü Jammu nung Union Home Minister, Amit Shah-i terenlok project balala semzüksüba aser project tasen atema lung azüngtsüba noksa nung angur.

Jammu & Kashmir nung opposition lenirtemi state jenjang akhanger

Srinagar/New Delhi, October 24 (Agencies): Union Home Minister, Amit Shah-i Jammu & Kashmir nem tanaben state jenjang agütsütsü ta nangzükba aser UT atema terenlok projects nangzükba agi opposition lenirtem melung masür.

Kashmir Valley nung CPM lenir, Mohammed Yousuf Tarigami-i, "Home minister Amit Shah-i Jammu & Kashmir semdangba mapang nung ni pa dang nungi aika imlaa liasü, ajisüaka tia maka pai nenshia kasa dang jembia aser Union Territory atema tasen kecha menanzük," ta ashi.

Paisa, "State jenjang agienba sülen union territory ana kümtsüba ajanga Jammu & Kashmir nüburtem dak tim mesüi inyakogo, ta J&K nung yimtenren party temi bilemer. Jammu & Kashmir nem state jenjang agüjang ta party ajaki akhanger," ta metetdaksü.

Congress lenir, Ghulam Nabi Azad-ia, election magidangyongi UT nem state jenjang tanaben agütsütsüla, ta takhangba agütsü.

"Ato kilonseri par kidang Kashmir nung party balala

nungi lenirtem jaokba mapang nung ni, state jenjang agütsüba sülen ang election agitsüla, ta takhangba agüja liasü. Tanga party temia kasa takhangbaji agütsü. Home minister-i onok dang state jenjang agütsütsü aser delimitation commission-i report agütsütsü ta shiogo," ta Azad-i metetdaksü.

"Delimitation ji mezüng masütsüla, iba sülen ang state jenjang agütsüra ibajibo tim masü," ta paisa ashi.

Honibarnü Amit Shah-i, delimitation inyakyim tembangba sülen ang election agitsü, iba sülenji ang UT nem state jenjang agütsütsü, ta metetdakja liasü.

PDP Tir aser taoba mapang chief minister, Mehbooba Mufti-i, international flights aser medical colleges semzüksübjaji tema tazütsü noksa dang lir, kechiyong ibaji ajanga Jammu & Kashmir indang chichiba tebilemstü onük mebentetsü, ta metetdakja liasü.

Mufti-isa, tepuokdak alirtem chiochtsüla, rongsenkettsüng tanaben asentenshitsü atema inyaksüla aser Kashmir nung nüburtemi tamang katettsüsa sorkari inyaksüla, ta ashi.



India nung coronavirus vaccine dose billion ka agütsüba nüngtem nung October 24, 2021 nü Ahmedabad nung Ato kilonser, Narendra Modi mesükba noksa inoker benjungtepba noksa nung angur.



Nisungtem face mask agir London, Britain nung aliba Tower Bridge anasa nokdaka aliba noksa ka yangi angur. Honibarnü Britain nung nisung 44,985 dak COVID-19 positive puteta iba linük nung coronavirus agi meneper nisung 8,734,934 jungogo, ta ketdangsürtemi sangdong ka ajanga ashi.

US envoy-i North Korea dang missile tendangba anentsü mepeshi

Seoul, Mongputeni/October 24 (Agencies): US-i Deobarnü North Korea dang "counterproductive" missile tendangba anentsü mepeshi aser Washington-i sensaksemtüsü atema jaokba Pyongyang-i agizüksü imlaba lemsatap.

North Korea-i, Mongolbarnü submarine-launched ballistic missile (SLBM) ka tendangba ajanga UN Security Council jongdak senden ka ayongzüka agitsüsa akümba sülen tang iba temepeshiba agütsüogo.

North Korea atema US special representative Sung

Kim-i, Washington nung Japan indang envoy den ajurutepeba sülen South envoy Noh Kyuduk den ajurutepeba liasü.

Paisa, Mongolbarnü missile tendangba ya amokmerenba inyakyim ka ta shia Pyongyang dang "counterproductive" missile tendangba anentsü mepeshia asüngdang.

"Onoki benokdangba dak sendakba nung DPRK-i telangzüba tajung agütsütsü imlar," ta Kim-i Seoul nung osang benertem dang ashi.

North-i long-range cruise missile ka tendangba densema hopta ishika tsüngda missile ishika tendangba sülen tatemsa

Mongolbarnü iba missile tendangogo.

Iba ita tetenzüklen North Korean lenir Kim Jong Un-i, parnok nem tenokdangba balala agütsüba ya US dak tai tongloksüogo aser Washington-i ashiba ama masü saka kar amaksü atema parnok tebilemba tamajung kecha mali, ta ashi.

Kim aser taoba tir Donald Trump na asemen ajurutepego, ajisüaka North indang nuclear program anendaksütsü atema telemteba ka magitet.

Kasa mapang nung tir Joe Biden-ia iba ken o bentettsü atema maneni inyaka arudar.

ASEAN yimjung sentongsülen anidaksü: Junta

Yangon, Mongputeni/October 24 (Agencies): Myanmar indang military yimsüsürtemi Deobarnü, ASEAN den yimjung atema nangzükteper aliba sülen takok tashi anidaksü nangzükogo, ajisüaka iba hopta summit amentsü aliba nung linük commander mezüngoksema atema aitsüogo.

Deobarnü state media ajanga sangdongba osang nung Junta-i ashiba agi, parnoki tanga linüktem den yimjung nung alitsü atema inyaksü aser April ita onük pongu nangzüktepeba dak sendakba nung Association of Southeast Asian Nations (ASEAN) den teka amteper inyaksü. Iba tenangzüktepeba ya China aser anüolen aliba linüktemia agizükogo.

ASEAN foreign minister temi October 15 nü Myanmar nung military lenir tongtiba Min Aung Hlaing mezüngoksemtüsü atema telemteba agi. Pai sentong yanglubatem benoka minyaktetba atema iba jenjang agi. Iba sentong kübok linük nung tashiyim amshiba anentsü, sensak asemtüsü atema achaayangtsü, humanitarian teyari agütsüdaktsütsü aser special envoy ka nem par linük nung kecha tenokdangba makai inyaksangshidaksütsü densema lir.

Junta-i Hokolbarnü, ASEAN-i parnok tsüngda nangzüktepeba aser linük ken o nung mejushitsü atema mulungtepeba sülen manidakba atema parnok aija liasü.

Parnokisa Min Aung Hlaing melena politically neutral Myanmar representative ka yoktsü atema benokba magizük.

Myanmar nung military-i sorkar atsüngba sülen nisung 1000 dak tema süogo aser nisung meyirejang aika tepuokdak yua lir, ta United Nations-i metetdaksü. Junta-i nüburtem dak military tashi tali amshiba atema aija arudar.

Kasa mapang nung junta-i, nisung tepsetertem aser pua alirtem ya kiralongrartem liasü, shirnoki linük tamendakdak anokshitsütsü merang, ta ashi. Junta tekolakbai taoba hopta, opposition temi linük nung mepetmesü ya atsülangdaksür, ta ashi.

ASEAN indang special envoy, Erywan Yusof-i mapa nungi anentsür aliba lenir Aung San Suu Kyi den ajuruteptsü mepeshi, saka military sorkari ashiba agi, la anema ken o balala benoka lir aser la sota lir asü nung la den ajuruteptsüji tamakoktsü.

Junta-isa, Erywan dang shadow National Unity Government densema opposition teloktem den sendaktep minyaksü tekümdangtsü metetdaksüogo.

Military-i, parnok ya Myanmar nung chichiba ketdangsürtem lir aser linük sorkar atsüngba ya coup ka masü saka temzüng ozüng kübok Suu Kyi-i aniba party-i sovereignty amokmerenba anema tenüngdaksü mapa ka liasü ta ashi.

Colombia nung temesepba mozü shibelener tetsüti ka puogo

Bogota, Monputeni/Oct. 24 (Agencies): Colombia nung security forces temi Dairo Antonio Usuga puogo, shiba linük nung temesepba mozü shibelener tetsüti aser 'most wanted' ka liasü.

Dairo Antonio Usuga dang ya Otoniel ta ajar, shiba Autodefensas Gaitanistas de Colombia mesüra the Gulf Clan indang lenir lir, aser pa ya Uraba region nung yimtsüng ka nung Honibarnü apu.

Tir Ivan Duque-i Otoniel apuba ya takok anguba ka amai tenüngsang agütsü aser küm 30 shi tejakdang Colombia nung temesepba mozü shibelener Pablo Escobar apuba den athishia liasü.

"Asen linük nung iba putu nung ibai temesepba mozü shibelener anema raraba nung mapa tulutiba alitsü. Ibai 1990s mapang Pablo Escobar laoba den medemdangtsü akok," ta Duque-i osangbener senden ka nung ashi.

Colombia tiri ashiba agi, par sorkari Otoniel ya bendang lima, talisa United States nung anir oa ken o jembitsü atema

mapa inyaker, kong pa ya temesepba mozü shibilenba ken o nung Manhattan federal court ka ajanga 2009 küm mezüng aija liasü.

Arishi küm 50 tain Otoniel ya US kübok Brooklyn aser Miami nunga mapa tamajung inyakba, alima tesem ajungalen cocaine shibilenba sentong nung shilem agiba aser temesepa mozü shibelener maparen atema nok-o-nü amshiba ken o nung tai tonglokja lir.

Colombia sorkari Otoniel apuba atema Human Rights Watch (HRW) nung Americas director Jose Miguel Vivanco-i tenüngsang agütsü aser pa lenisüba kübok mapa tamajung noklang aika inyakba atema pa nem tapet temerenshi agütsütsüla, ta ashi.

Ketdangsürtemi küm aika Otoniel aputsü meranga aru aser iba mapang pa den sendaktepa alirtem tepset, par kinungertem apu aser pa indang senotsü mita bushia liasü. Pa aputsüsa osang agütsüteter nem sen \$800,000 agütsütsü ta Colombia-i sempet nangzük

asir US-i pa kolak nung sen million \$5 jenjang ateta liasü.

Otoniel apuba ajanga Gulf Clan tembanger, ta Duque-i ashi, saka aikati iba ya ajanga azüdokshi ang tali ajurutsü ta ashir.

"Kodang tentet ka nung tekolakba, lenir ka laodaksüdir, parnok melener nisung aika renema alir. Aser kasha Otoniel dak ataloktsü," ta Colombia Risk Analysis nung director Sergio Guzman-i ashi.

Ajisüaka Otoniel apuba ya takok ka lir, kechiaser yimdak yimtsüngtem nung telungpur telok balala matsüngdak Colombia security forces tamakok ajurua aliba mapa iba ya ataloker, ta Guzman-i ashi.

"Parnoki Colombia nung mapa tamajung inyaker ka apuba ya kanga junger. Parnoki pa mekhaset, parnoki pa mepokset. Tetetzü yangji itdangiter liasü, yangji parnoki teka amoshiteta liasü," ta Guzman-i ashi.

Otoniel aputsü atema operation agiba nung US aser United Kingdom ajanga itdangitera osang agütsü aser

arem mita bushiba nung Colombia indang special forces 500 dak tema aser helicopter 22 amshia liasü, ta The Associated Press news agency ajanga ashi.

Otoniel ya Panama den arütsü anasa north-west Colombia nung aliba Antioquia province kübok pa atsükshia aliba yimtsüng ka nung apu.

Pa aputsü operation agiba mapang police ka tepseta liasü.

Otoniel-i pa jenshia senzütsü atema rural safe houses indang network ka amshia liasü, pai phone kata mamshi aser osangtsüsang agiteptsü atema osangbener dak metaloker liasü.

Saka pa apuba mapang aliba tesem ya hopta ana tejakdang jangjar liasü, ta El Tiempo osangkaket ajanga ashi.

Pa senzüsempongba ya signal intelligence expert 50 dak temai satellite nungi tangokba noksatem amshia tsüngsü pua liasü, ta police tekolakba, Jorge Vargas-i ashi.

Taoba mapang Usuga Clan ta nungja agütsür aliba Gulf

Clan indang taoba lenir - pa teti - police temi küm ter tejakdang New Year benjong mapang tepsetba sülen pa tekolakba akum.

Colombia security forces temi par telok ya linük nung mapa tamajung inyakba lokti tentet tashi tulutiba, ta züngshia arur aser US nung aliba ketdangsür temia parnok ya nok-o-nü peria aliba aser mit-moro kangasa tamajung telok ka, ta züngsjia liasü.

Iba telok ya province aika nung lir aser linük balala nung tesendaktep lir, aser parnok ya temesepba mozü aser nisung shibelenba, ozüng alema hon atoba aser rakzükkraktemba maparen inyaka liasü.

Iba telok nungya züngsem 1,800 shi alitsü sudi ta amanger, aser parnok ya timba far-right paramilitary teloktem nungi shimok. Iba telok nung züngsemtem ya Argentina, Brazil, Honduras, Peru aser Spain linüktem nunga puogo.

Parnoki Colombia nungi US aser Russia tashinung temesepba mozü shibelenba lenmangtem amokbanga liasü.

'Miss Glamour Look International India 2022' nung Lickpo Konyak-i shilem agitsü



Kohima, Mongputeni/ October 24, 2021 (TYO): Honibar nikongdang, Four Seasons Hotel, Dimapur nung, Glamour Hub Entertainment Nagaland-i Miss Diva Nagaland 2021, Lickpo Konyak nem takok korang agütsüba (crowning ceremony) sentong ayonga agiogo, ta sangdong ajanga metetdaksü.

Iba takok den külemi, Lickpo Konyak-i Nagaland tenung nungi taruba "Miss Glamour Look International India 2022" sentong nung shilem agitsü terenemba lir.

Iba sentong (crowning ceremony) nung Siddhart Chetri menden liasü. Tentet balala talisa KSU, KNSK aser Lickpo'er adianutem aser temeimertemi iba sentong nung o jembiogo.

Kasa sentong nung, Glamour Hub Entertainment Nagaland, CEO, Sasongdangba Yaden-ia jembia liasü, ta kasa sangdong ajanga metetdaksü.

SÜR KÜM KA AJUNGBA BILEMTETER Mrs. N. Takumla Jamir (Chuchuyimlang Town)



Onoki kodanga amatsü makokba ojala aser otsüla, küm ka abensa na onok den meliaka nü temeim mapatem bilemtetera tanü sarasadema amonger. Na ochishir, tasü tait, teti menüremjak tenür aliba tamangtir ojala menungraseta na taküm ali ama onok tasü aiter. Atangji na teti anisüngzük lima nung pelaseta alitsü ozü teyimla.

Temeim jala, jabaso, semchirtem aser kinungertem

MAMATETER ASÜR WT. CHUBAINLA JAMIR



Kümsembuba, saka yashi ama dang.

Tanü na Obalar kidangi teti atema aoba menungraseta bilemteter.

Metsü mapang, luyang ken süi medem, ne kensü ola, Nai temoka yutsüba narotem, süngdonglidong, Arogo aser mapa tajungtem

Ajaki na kümrem menungraa bilemteter-a ni !!!
Tsüngrem tenung asanger !

- Temeim Kinungbo, Jabaso, aser Kidongkimang.

December 7 nü 'Mr Grand Nagaland 2021' agitsü

Kohima, Mongputeni/ October 24, 2021 (TYO): State nung 'Fashion industry' den külemi 'tourism' ajungkettsüsü nükjidadong nung, December 07, 2021 nü Kohima nung Nagaland indang Glamours Hub Entertainment-i Mr Grand Nagaland 2021 sentong ayongzüksü terenemba lir, ta sangdong ka ajanga metetdaksü.

Aruya aliba Mr Grand Nagaland 2021 sentong ya Glamours Hub Entertainment (Nagaland) den Rubaru Group longjemer ayongzüksü. Iba tentet (Rubaru Group) ajanga Rubaru Mr India sentong ayongzükter.

Iba sentong nungsa, Mr India



Songashim Rungsung

United Continents, Songashim Rungsung adentsü. Songashim-

i Mr Grand Nagaland 2021 sentong nung mentor aser tetendanger ama shilem agitsü.

Sempet tajung alir lanurtem, shirnoki fashion aser modeling industry nung shilem agitsü janngar, parnok jangjatetsü aser sabang ka agütsüsü asoshi, iba tentet ajanga institution balala nung campus audition ayongzüksü sentong lir.

Iba audition nungi semi-finalist tem online ajanga criteria balala nung asadanger sülen shimtsü asoshi telemtetba agitsü.

Takok angurtem, Rubaru Mr India, 2022 title atema tokteptsü aser shilem agitsü asoshi direct entry angutsü, ta kasa sangdong nung shia lir.

Tanü Rajinikanth nem 'Dadasaheb Phalke Award' agütsüsü

New Delhi, Mongputeni/ October 24, 2021 (Agencies): Hombarnü (25.10.2021), Megastar Rajinikanth nem 51buba Dadasaheb Phalke Award agütsüsü. Indian cinema tsüsü shilem tulu agiba atema, Rajinikanth-i iba tetushi award agizüksü.

Taküm April ita BJP Rajya Sabha MP Prakash Javadekar-i iba osang mezüing sangdonga liasü. Kasa osang lepsia metetdaksüba mapang, Twitter ajanga Directorate of Film Festivals, India-i, "@rajinikanth, shiba dang fans temi temeim agi 'Thalaiva' ta ajar, October 25, 2021 nü pai 51buba #DadasahebPhalkeAward agizüksü, koba India indang tetushi award tematiba asütsü," ta lemsatep.

Iba osang angashia, Rajinikanth-ia Twitter nung, pelaba den Hombarnü (25.10.2021) tongtibang sentong ana agitsü aliba indang lemsatep.

"Asüing (Hombar) anogo kanga tongtibang asütsü, kong sentong ana tashi agitsü renema lir. Mezüingbuba sentongji "Dadasaheb Phalke award" agizüksü maongka tulu ya asütsü, koba India Sorkar ajanga agütsür, kechiyong nübur temeim aser teyari ajanga tanü ni iba award agizüksü maongka angur. Tanabuba sentongji, kü jala Soundarya Vishagan indang app ka sayaba sentong asütsü. Tangar teyari magii, nüburtem atema lai 'HOOTE' ta nungja agütsüba app ka yangluogo aser alima dang lai iba app sayatsü terenemba lir. Iba app ajanga nüburtemi pei tebilemba aser tasa tem pei shimba oshi nung lemsateptsü akok. HOOTE APP sayatsü maongka anguba asoshi pelar," ta Rajinikanth-i lemsatepa liasü.

2019 küm atema Dadasaheb Phalke Award ya taoba küm sangdongtsü renem, saka alima ajunga asüingba COVID-19 wara ajanga National Film

Awards 2019 den külemi iba sentong agitsü anogo atsülangja liasü.

2018 küm, megastar Amitabh Bachchan-i iba award agizüka liasü. 1991 action-drama 'Hum' nung Amitabh-i Rajinikanth den külemi shilem agiba ajaki jangjaa lir.

Rajinikanth, shiba, Padma Vibhushan award agizükter rongnung ka lir, pai Bollywood aser South Indian film aika nung shilem agiogo aser pa sapurtem aika lir. Padma Vibhushan award ya Republic of India indang civilian award rongnung tanabuba asütsü.

Film industry nung ajemoka, Rajinikanth-i 1975 küm K Balachander indang 'Apoorva Ragangal' nung shilem agiogo aser Tamil film industry nung küm 45 dak tema inyakogo.

'Kabali' nung tongti shilem agisang, Rajinikanth, shibai AR Murugadoss indang 'Darbar' nung tesüsa shilem agiogo, 'Annaatthe' film nung pai tongti shilem agiba yakta angutsü.

MULUNGNEŃ O

Ajemalu aser taremsük tetsü asür **Yongpangla** (Chungtia), shiranga aliba mapang nungi tasünü tashi shirnokisa shisatsü, nübu, rongsen aser tamang sarasadem agi nungita yaritepogo, nenok ajak dang kangasa pelaba lemsateper.

Ajak Takoksang Tsüngremi nenok mapa tajung lepa moajangma ta ozü sarasadem.

Temeim Kinungbo, Chinur, Anükapang aser Semchir.



**ASO : 1945
ASÜ : 19/10/2021**

--- SANGDONGER ---

Chuchuyimpang Mongoya Prayer Garden nung 29th to 31st Oct 2021, anogo asem Healing Crusade sentong renema lir. Anungji nübur kar danga shi aser tanela nung taneptsü aginüa lira arua Tsüngremer temoatsü agitsü Arogo ajanga lemsateper. Iba sentong mapang sorkar tetuyuba SoP amshitsü.

Tongteprateptsü atema : M- 9856486841 / 8258802047

Mapang - Aonung : 5:00 PM. Anepdang: 9:00 AM.

Nikongdang : 12:00 PM

ASLB SANGDONG

Taoba mapang sangdonga aliba ama, alima wara mopung tamajungba mekümra COVID-19 SOP tazüokba kübok, Yimpoksü (Nov) 24-26, 2021 tsüingda ASLB-i achaayanga agiba Arangtet Tatidag agitsü lemtetogo. Tesem kobasa nung agitsü anogo ishika tsüingda nung metetdaksütsü. Anungji kari danga ASLB Arangtet tenren 2021 mungui lira office den tongteprateptsü sangdonger.

Sd/- (Rev. Dr. Rongsen Longkumer)
Convenor, ASLB, AC

Sd/- (I. Temjen Tzüdir)
Secretary, ASLB, AC

Reshma Singh aser Raj Prohlad Neog nati MTB Cyclothon kokogo

Dimapur, Mongputeni/October 24 (TYO): Dorians Society-i October 23 nü Dimapur nung ayongzükba MTB Cyclothon 2021 nung tetsür aser tebur asaya Kohima nungi Reshma Singh (arishi küm 29) aser Assam, Jorhat nungi Raj Prohlad Neog (arishi küm 19) nati kokogo.

Singh-i 25km course ya ghonda 1:05.55 nung longjem aser Neog-i teburtem atema 57km course ya ghonda 2:08.41 nung longjema liasü.

Tetsürtem category nung Vikhotuonuo-i (arishi küm 22) ghonda 1:07.30 aser Vungthunglo Ovung-i (arishi küm 21) ghonda 1:15.45 nung alizüng tongteta tena tanabuba aser tasembuba jenjang nung liasü. Teburtem category nung Kevithozo Casavi-i (arishi küm 21) ghonda 2:12.35 aser MK Thalaiva-i (arishi küm 35) ghonda 2:12.46 nung alizüng tongteta tena tanabuba aser tasembuba jenjang nung asaya tembang.

'Open' tetoktepba nung nisung 20-i shilem agia liasü.

Iba race ya DC office traffic point nungi anepdang 6:00 ako nungi tenzük aser State Stadium nung tembanga liasü.

DC office Police Point nungi race tenzükba sülen



tetokteperitem City Tower Junction - Holy Cross Junction - Bata Chariali - Town Hall Police Point - Kuda Village - Lungwiram Junction - Toulazouma - Zoological Park - Singrijan - New Chümoukedima Village - Sukhovi Gate - Vidima - Kiyeto - Dhansiripar Junction - OTS - Singrijan - Zoological Park - Thahekhu Junction - Thahekhu Village - Signal Basti - Dhobi Nala - Midland longa senzüba sülen State Stadium nung tembanga liasü.

Tetoktepba nung senpet ajak senteper sen 80,000 agütsü. Dorians Society tenteter 2022 küm, küm 25 ajungtsü aliba nungtem nung sentong balala

ayongzükba agiba rongnung iba race yaa shilem ka liasü.

Teburtem rongnung takoker Neog-i iba race ya kanga junga ayongzükba race ka liasü ta ashi. Pai, "race kanga junga ayongzükogo aser sentong ayongertemi teka amteper inyakogo. Lenmang jangrademtsüka liasü. Ni jangradema shilem agiogo aser takok anguba atema kanga pelar. Taruba race nunga arua shilem agitsü imlar," ta ashi.

Tanabuba jenjang nung tembangsa Gear Trails nungi Casavi-i, tang tashi nung tanü toktepba lenmang ya pa asoshi talangtiba liasü, ta ashi. "Ni shilem agiba race tem rongnung iba lenmang ya

talangtiba ka liasü. Iba race nung shilem agiba ya tajangshiba tajung ka aser kasa mapang nung jangrademtsüka liasü. Iba amala tetoktepba tajung ayongzükba atema ni Dorians Society nem teningsang agütsür. Maneni ni ozü team; Gear trails nem ni nongita yariba atema teningsang agütsür," ta pai ashi.

Dorians Society ya senotsü ajangzüktsü atema tentetba

lokta ka masü aser parnok nukjidongji saisapong ajungkettsü aser iba den lokti ajangzüktsü atema maparen balala benoka inyaksü asoshi lir. Society sangdong ka ajanga ashiba agi, "onok nukjidong rongnung kaji asen state nung saisapong balala ajungshitsü atema lir. Saisapong ya hadir ka ama amshia onoki tarutsü lenir aser asayartem ajungketner," ta ashi.

KDVA ajanga metetdaksür

Kohima, Mongputeni/October 24 (TYO): Kohima District Volleyball Association (KDVA)-i sangdong ka ajanga, aruya aliba 8th Kohima District Open Volleyball Tournament 2021 (tetsür aser tebur) atema Sports World, Main Town, Kohima aser Star Sports, Near Southern Angami Sumo Parking nung form angutsü, ta metetdaksü.

Anungji, iba asayamung nung shilem agitsüpur team temi November 06, 2021 tashi nung form agütsüsüla.

Tetsür aser tebur atema 8buba Kohima District Open Volleyball Tournament 2021 ya November 10 nungi 13, 2021 tashi Kohima Local Ground nung asayatsü, ta kasa sangdong ajanga metetdaksü.

Ibuba inter-departmental badminton asayamung tembangogo

Kohima, Mongputeni/October 24: Ibuba inter-departmental badminton

asayamung anogo ana songtema asayar October 23 nü tembangogo. Iba asayamung ya Inter-Department Badminton Club Kohima tawabangba kübok Nagaland Legislative Assembly (NLA) Multi-Purpose Hall nung asayaa liasü.

Tarep temeyoktep asaya PHQ nungi Wapang aser Uma Tamang nati akok aser School Education nungi tarep Shanavas C aser Ajungla na runner-up liasü.

Tetsür tarep asaya PHQ nungisa Uma Tamang aser Shoniu nati akok aser Medical department nungi Christina Rutsa aser Bendangsangla na runner-up liasü.

Tebur tarep asaya AG nungi Arep Ao aser Impoti nati akok aser PHQ nungi Rhovisie aser Wapang na tanabuba jenjang nung tembang.

Iba asayamung nung department 22 nungi team 55-i shilem agia liasü.

Kohima Press Club asayamung osang



Dimapur, Mongputeni/October 24 (TYO): October 23 nü Indoor Badminton aser TT Stadium, Kohima nung Kohima Press Club (KPC) asaya anogo ayongzükba mungogo.

Iba saisapong sentong nung press club nungi züngsem 40-i shilem agia liasü.

KPC-i iba asayamung takok asoshi teyari agütsürtem dang kanga pelaba lemsatepogo. "Nisung aikati iba sentong takok ngua asayatetsü asoshi tejakdangi arua teyari agütsüogo. Onok indang sponsor karibo parnok tenung metetshidaksünü liasü, saka Press Club-i parnok ajak dang kanga pelar. Talisa onoki MLA aser Advisor Technical Education Medo Yhokha, MLA Khriehu Liezietsu;

Director Information & Public Relations Tokishe Sema; APC Kikheto Sema; Lichan Humtsoe proprietor Ete Coffee; K Seyie, proprietor Seyie Motors; Heritage staff aser iba sentong takok asoshi teyari balala agütsürtem ajak dang kanga pelaba lemsateper," ta club sangdong ajangsa metetdaksü.

Asaya balala nung takok angurtem vamai alitsü:

Arm Wrestling (tetsür)

1st - Loreni Pfozhe (Freelancer)

2nd - Esui Liegise (DIPR)

Arm Wrestling (tebur)

1st - Medo Dzeyie (Capi)

2nd - Ketouvilie Kire(Capi)

Badminton (tetsür kija)

1st - Medolenuo Loucü (East Mojo)

2nd - Emilo K. Konyak

(Nagaland Post)

Badminton (tebur kija)

1st - Medo Dzeyie (Capi)

2nd - Thepfuvilie Keditsu (NM Cable)

Badminton (tarep temeyoktep)

1st - N. Khayi & Alice Yhoshü

2nd - Narain B. Sagar & Emilo K. Konyak

Table Tennis (tetsür kija)

1st - Esui Liegise (DIPR)

2nd - Loreni Pfozhe (Freelancer)

Table Tennis (tebur kija)

1st - N. Khayi (DDK)

2nd - Thepfuvilie Keditsu (NM Cable)

Table Tennis (tarep temeyoktep)

1st - N. Khayi aser Alice Yhoshü

2nd - Narain B. Sagar aser Esui Liegise.

ATP Finals atema Andrey Rublev qualify süogo

Mongputeni/October 24, 2021 (Agencies): Russia nung asayar Andrey Rublev, ATP Finals atema qualify asür asayar pongububa kümogo. Iba asayamung ya taruba ita Turin nung asayatsü.

ATP Finals ya tebur kija asayartem rongnung tajungtiba ti aser tarep ti asayar. Russia

nunger asayar ya iba asayamung Turin-i belener mao tsüingda 2020 küm London nung asayaba mapang mezüngbuba asaya liasü

"Iba asayamung nung asayar tajungtiba ti den tokteptsü atema maongka anguba atema kanga pelar," ta Rublev-i ashiba ATP sangdong ka ajanga Honibarnü metetdaksü. "Iba asayamung ya tanga dang nungi balaka aser kanga dang tetushi asayamung ka lir aser ni asayatsü matateter," ta paisa ashi.

Arishi küm 24 tain Rublev ya iba asayamung nung Serbia nunger world number one

asayar Novak Djokovic, külem Russia nunger asayar aser U.S. Open champion Daniil Medvedev, Greek nunger asayar Stefanos Tsitsipas aser Germany nunger asayar Alexander Zverev nunger den asayatsü. Iba asayamung ya November 14 nungi 21 tashi asayatsü.

Pa tang jenjang trokbuba nung lir aser taoba ita pai teburtem ranking nung jenjang pongububa tongtetogo, koba pa indang career nung ranking tajungtiba asütsü.

Italia nunger asayar Matteo Berrettini, Norway nunger Casper Ruud aser Poland nunger Hubert Hurkacz nunger iba asayamung atema qualify asütsü atatepdar. Kasa mapang nung Spain nunger nungtugu asayar Rafa Nadal-a iba asayamung atema qualify asütsü maongka liasü saka pa yiruba ajanga masayatetsüsa kümogo.

BILEM DANGANG

"Nai angazüktsü mejangrara shingai mesayutetsü."